

**Ilisimatusarfimmi Ilinniartitsisunut, Perorsaasunut aammalu Isumaginninnermut  
Siunnersortinut ataatsimut kandidatinnngorniarfissamik Naalakkersuisut  
pilersitseqqullugit peqquneqarnissaannik Inatsisartut aalajangiiffisassaattut  
siunnersuut.**

*Inatsisartunut ilaasortamit Najaaraq Møllerimit saqqummiunneqartoq*

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Najaaraq Møller, Siumut, siulittaasoq

Inatsisartunut ilaasortaq Mette Arge-Hammeken, Naleraq, siulittaasup tullia

Inatsisartunut ilaasortaq Dines Mikaelson, Siumut

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Edvard Nielsen Aronsen, Inuit Ataqtigiit

UPA2024-mi ulloq 18. april siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Ilisimatusarfimmi Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnngorniarfissamik Naalakkersuisut pilersitseqqullugit peqquneqarnissaat siunnersuuteqartup siunnersuummi matumani kissaatigaa. Professionsbachelorit amerlanerusut ilinniagaq aqqutigalugu ingerlaqqissinnaanissaat taamaalillutillu atugassarititaasunik pitsaanerulersitsinissaat kiisalu sulianik ilisimatusarnerup annertunerulernissaa qulakkiissallugu siunnersuummi siunertarineqarpoq.

**Siunnersuutip Inatsisartuni siullermeerneqarnera**

Kandidatinngorniarnep susassaqrarfiit iluanni ilisimatusarnernik annertusaataanissaa pillugu annertuumik isumaqatigiittoqarpoq, ilutigisaanillu oqaatigineqarpoq inuiaqatigiinni perorsaasut, ilinniartitsisut isumaginninnermullu siunnersortit ilinniarlarsimasut amigaatigineqartut. Professionsbacheloritut naammassinikut arlallit ilinniarsimasaminnut assingusumik kandidatinngorniarsimasut amigaateqarnertik peqqutigalugu sammisanut allanut ingerlaqqittartut maluginiarneqarpoq. Taamatuttaaq ilinniarsimasut piumaneqarnerata annertussusaa naammassanersoq pillugu, kiisalu kandidatinngorniarnissamut allaffissornikkut aningaasatigullu kingunerisassai allaqqasut pillugit oqallittoqangaatsiarpoq.

### **Sassartitsinerit**

Persorsaanermik Ilinniarsiup (PI/SPS) forständeria ulloq 2. maj 2024 ataatsimiititaliamut sassartinneqarpoq. Sassartitsinerimi perorsaasut, ilinniartitsisut isumaginninnermullu siunnersortit ataatsimoorussamik kandidatinngorniarsinnaalernissaannut innersuussut ataatsimiititaliamut paasissutissiissutigineqarpoq (**Ilanngussaq 1**). Susassaqrarfiup iluani kandidatinngorniarnep suna imarisinnaaneraa pillugu ulloq 18. april 2024 ilisimatusarfimmeersut saqqummiuppaat. Taamatuttaaq Nunatsinni Perorsaasut Kattuffiat (NPK) ulloq 6. maj 2024 ataatsimiititaliamut sassartinneqarpoq.

### **Naalakkersuisumut allakkatigut apeqqutit**

Ataatsimiititaliap siunnersuummik suliarinninnissaminut atatillugu Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq apeqqutinut arlalinnut akissuteqaqqullugu ataatsimiititaliamit qinnuigineqarpoq. Ataatsimiititaliap apeqquteqaataasa assiliner aammalu Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissuteqaataasa assilinerat isumaliutissiissummut matumunnga **ilanngussaq 2-tut aamma 3-tut** kakkiunneqarput.

### **Siunersiuineq**

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq ataatsimiititaliap siunnersuummik suliaqarnerminut atatillugu ulloq 18. maj 2024 siunersiuinissamut aggersarpaa. Aggeqqusissutip assilinerat matumani isumaliutissiissummi ilanngussaq 4-tut kakkiunneqarput

### **Ataatsimiititaliap siunnersuummik suliarinninnera**

Kandidatinngorniarsimasut pilersitsinissaq tapersorneqarluartoq ataatsimiititaliamut maluginiarneqarpoq, tamassumalu ilutigisaanik ilinniartitsisut, perorsaasut isumaginninnermullu siunnersortit qaffasinnerusumik ilinniagaqalersinnaanissaat qulakkeerneqassaaq, taakkua inuiaqatigiinni ilinniarsimasut qaffassaataasinnaallutik

suliffeqarnermullu iluaqutaasinnaalluni.

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq siunnersuutip siullermeerneqarnerani allannguutissatut siunnersuummik saqqummiussivoq:

*Naalakkersuisut kandidatitut ilinniakkanik marlunnik imminnut ataqatigiissunik allartitsisoqarnissaanut periarfissanik misissueqqullugit peqquneqarnissaannik Inatsisartut aalajangiiŋfigisassaattut siunnersuut, taamaalillutik ilinniartitsisut, perorsaasut, isumaginninnermilu siunnersortit tamakkiisumik sulinermik saniatigut kandidatitut ilinniarsinnaalissallutik. Misissuinerup imarissavaa, ilinniakkani aamma ilinniartunut kissaatigisat, pisariaqartitat aningaasaqarnerlu. Tamanna pillugu nalunaarusiaq innersuussutitalik kingusinnerpaamik UPA2025-mi Inatsisartunut agguanneqassaaq.*

**Kandidatitut ilinniakkanik marlunnik imminnut ataqatigiissunik** allartitsisoqarnissaanut **periarfissanik misissuisoqassasoq** Naalakkersuisut allannguutissatut siunnersuutaanni allaqqasoq ataatsimiititaliamit maluginiarneqarpoq. Ilinniartitsisut perorsaasullu akornanni ilinniaqqinneq **inunnut sammisuussasoq** aammalu isumaginninnermut siunnersortinut **inuaiaqatigiinnut sammisuussasoq** isumaqartoqarnera tassunga peqqutaavoq. Tamatuma saniatigut ilinniarfik pillugu aningaasaqarnermut tunngasut kiisalu ilinniartut pisariaqartitaat kissaataallu misissuinermut ilanngunneqassasut Naalakkersuisumit kissaatigineqarpoq.

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup allannguutissatut siunnersuutaa ilinniartunut alimasissumik ilinniarnissamut periarfissiissasoq ataatsimiititaliamit maluginiarneqarportaaq, taamaalillutik ilinniartut ilinniarnermi saniatigut suliffeqarsinnaallutik, naatsorsuutigineqarsinnaallunilu professionsbachelorit arlallit Nuup avataani najugallit ingerlaqqissinnaassasut. Alimmasissumit ilinniartitsinermut periarfissat misissorneqarnissaa pillugu Naalakkersuisut suliaqarniarnerat ataatsimiititaliamit tapersorneqarpoq.

Ilinniartitsisunut, perorsaasunut isumaginninnermullu siunnersortinut kandidatitut ilinniakkamut ataatsimut aammalu marlunnik imminnut ataqatigiissunik pilersitsisoqarpat aningaasatigut kingunerisassai pillugit Naalakkersuisup allakkatigut akissuteqaatai ulloq 15. maj 2024-imeersut (**ilannugssaq 3**) aamma ulloq 18. maj 2024 siunnersuutinermi akissuteqaatai ataatsimiititaliamit tusaatissatut tiguneqarput.

### **Siunnersuutip aningaasatigut kingunerisassai**

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut.

Ilimasaarutigineqartutut ilinniakkap aallartinneqarnissaanut pilersaarusiornernut AC-fuldmægtigip ukiuni pingasuni sulinissaa pisariaqartinneqassaaq, tamannalu 1,5 mio. Kr. naleqqassasoq siunnersuummi matumani allaqqasoq ataatsimiititaliamit maluginiarneqarpoq.

### **Ataatsimiititaliap inassuteqaatai**

*Ataatsimiititaliap isumaqatigiittup Inuit Ataqatigiinneersut, Siumumeersut aamma Naleqqameersut ima allannguutissatut siunnersuuteqarput tamannalu akuerisassanngortillugu:*

- *Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnngorniarfissamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut, tassani suleqatigiissitap Naalakkersuisunit pilersinneqartup inassuteqaatai aallaavigineqassallutik, alimmasissumit ilinniartitsinissamut periarfissat ilanngullugit.*

*Ataatsimiititaliap isumaqatigiittup Inuit Ataqatigiinneersut, Siumumeersut aamma Naleqqameersut Naalakkersuisunut kaammattuutigaat:*

- Perorsaasut pineqartillugit kandidatinnngorniarnernut ilinniakkap aaqqissuunnerata suliarineqarnerani IP/SPS ilaatinneqassasoq, tassunga ilinniartitsisut, perorsaasut isumaginninnermullu siunnersortit ataasiinnarmik ataatsimoorussamik kandidatinnngorniarinnaalernissaannut PI/SPS'p innersuussutaa ataatsimiititaliamit innersuussutigineqarpoq (ilanngussaq 1).
- PI/SPS Ilulissaniittup ilinniarfissatut atorneqarnissaa Naalakkersuisup isumaliuteqarfigissagaa.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

---

Najaaraq Møller  
Siulittaasoq

---

Mette Arqe-Hammeken  
Siulittaasup tullia

---

Dines Mikaelen

---

Peter Olsen

---

Edvard Nielsen Aronsen